

UREDBA O ISPLATI POMOĆI RADNICIMA OD STRANE POSLODAVCA*

("Službene novine Federacije BiH", br. 8/25, 14/25 i 58/25)

Član 1.

(Predmet Uredbe)

Ovom uredbom uređuje se pravo na isplatu pomoći radnicima od strane poslodavca, dinamika i visina isplate kao i način realizacije.

Član 2.

(Pravo na pomoć)

(1) Pravo na pomoć iz člana 1. ove uredbe ima lice koje ima zasnovan radni odnos sa poslodavcem u skladu sa članom 4. Zakona o radu ("Službene novine Federacije BiH", br. 26/16, 89/18, 44/22 i 39/24).

(2) Pravo na pomoć iz člana 1. ove uredbe imaju poslodavci koji:

- redovno isplaćuju plaće i uplaćuju doprinose za zaposlene u skladu sa važećim propisima;

- **nemaju neizmirenih obaveza po osnovu poreza na dohodak i doprinosa za obavezna osiguranja propisana Zakonom o doprinosima ("Službene novine Federacije BiH", br. 35/98, 54/00, 16/01, 37/01, 1/02, 17/06, 14/08, 91/15, 104/16, 34/18, 99/19, 4/21 i 6/23) i Presudom Ustavnog suda Federacije Bosne i Hercegovine, broj U-22/21 od 21.03.2023. godine ("Službene novine Federacije BiH", broj 28/23) kao i izuzetno, ukoliko su zaključili sporazum sa Poreznom upravom Federacije Bosne i Hercegovine (u daljem tekstu: Porezna uprava) o odgodi ili plaćanju obaveza u ratama, u skladu sa posebnim propisima koji ovo reguliraju i uredno izmiruju obaveze u skladu sa zaključenim sporazumom (izmjena 14/25).**

Član 3.

(Iznos pomoći)

(1) Poslodavac može, na osnovu ove uredbe, izvršiti isplatu pomoći svojim radnicima do **400,00 KM (četiri stotine KM)** mjesečno u skladu sa finansijskim mogućnostima i pravilima propisanim ovom uredbom (izmjena 58/25).

(2) Poslodavac može izvršiti isplatu pomoći radniku i u iznosu koji je manji od iznosa iz stava (1) ovog člana.

(3) Pomoć iz stava (1) ovog člana može se isplatiti u periodu od dana stupanja na snagu ove uredbe a najkasnije do dana prestanka važenja ove uredbe.

(4) Poslodavac ne može primijeniti odredbe Uredbe na način da radniku umanju plaću koja mu je obračunata i isplaćena za mjesec novembar 2024. godine. **Plaća za novembar 2024. godine, u smislu ove odredbe, je plaća bez uvećanja za: prekovremeni rad, noćni rad, rad u dane sedmičnog odmora, rad u dane praznika ili drugim danom za koji je zakonom određeno da se ne radi odnosno druga uvećanja plaće koja zaposleniku pripadaju u skladu sa propisima o radu (izmjena 14/25).**

(5) Isplata pomoći iz stava (1) ovog člana će se vršiti isključivo na transakcijske račune radnika.

(6) Pomoć iz ovog člana se ne smatra plaćom ili naknadom plaće prema odredbama Zakona o radu.

Član 4.

(Dinamika isplate)

(1) Isplata pomoći zaposlenicima se može vršiti mjesečno, najkasnije do zadnjeg dana u mjesecu za prethodni mjesec.

(2) Mjesečna pomoć u visini do 450,00 KM, u skladu sa Uredbom o isplati pomoći radnicima od strane poslodavca ("Službene novine Federacije BiH", br. 8/25 i 14/25), može se isplatiti zaključno sa mjesecom **julom 2025. godine**. Isplata pomoći za juli 2025. godine može se izvršiti najkasnije do **31.08.2025. godine** (izmjena 58/25).

(3) Mjesečna pomoć u visini do 400,00 KM, u skladu sa ovom uredbom, može se isplatiti za mjesec **od augusta do decembra 2025. godine**. Isplata pomoći za decembar 2025. godine može se izvršiti najkasnije do **31.01.2026. godine** (izmjena 58/25).

* Uredba je objavljena u "Službenim novinama Federacije BiH", broj 8/25 od 5. februara 2025. godine, stupila je na snagu 4. februara 2025. godine, a prestaje važiti 31.07.2025. godine. Izmjene i dopune Uredbe su objavljene u "Službenim novinama Federacije BiH", broj 14/25 od 26. februara 2025. godine, stupile su na snagu 21. februara 2025. godine i 58/25 od 1. avgusta 2025. godine, stupile su na snagu 30. jula 2025. godine, a primjenjuju se od 1. avgusta 2025. godine.

Član 5.

(Osnov za isplatu pomoći)

Poslodavac je dužan donijeti interni akt kojim će se, između ostalog, urediti iznos i uslovi isplate pomoći radnicima.

Član 6.

(Pojedinačni akti)

Pojedinačni akti, koje donosi poslodavac za ostvarivanje prava iz člana 2. ove uredbe, obavezno se donose u pisanom obliku.

Član 7.

(Izvrštavanje)

(1) Poslodavac je dužan, do 07. u mjesecu za protekli mjesec u kojem je izvršena isplata pomoći, dostaviti nadležnoj Poreznoj ispostavi Izvještaj o isplati pomoći.

(2) Porezna uprava će po prijemu navedenog Izvještaja izvršiti kontrolu ispunjenosti uslova za isplatu pomoći propisanih ovom uredbom.

(3) Obrazac Izvještaja iz stava (1) ovog člana nalazi se u prilogu ove uredbe i čini njen sastavni dio.

(4) Porezna uprava je dužna zbirne podatke iz izvještaja iz stava (1) ovog člana, dostaviti Federalnom ministarstvu finansija (u daljem tekstu: Ministarstvo) do kraja mjeseca za prethodni mjesec.

(5) Ministarstvo će mjesečno dostavljati Vladi Federacije Bosne i Hercegovine (u daljem tekstu: Vlada) informaciju o izvršenim isplatama, u skladu sa ovom uredbom, u cilju praćenja efekata ove uredbe.

Član 8.

(Stupanje na snagu i prestanak važenja)

Ova uredba stupa na snagu danom donošenja i objavit će se u "Službenim novinama Federacije BiH", a prestaje važiti **31.12.2025. godine** (izmjena 58/25).

IZVJEŠTAJ O ISPLATI POMOĆI U SKLADU SA UREDBOM

za _____(mjesec) 2025. godine

Prvi dio – Podaci o poslodavcu

JIB	Naziv poslodavca	Adresa poslodavca

Drugi dio – Podaci o isplaćenoj pomoći

Ukupan broj radnika kojim je pomoć isplaćena	Ukupan iznos isplaćene pomoći za izvještajni mjesec

Datum podnošenja izvještaja _____

MP

Potpis poslodavca
